



Inatsisartunut Ilaasortaq Anthon Frederiksen, Partii Naleraq
Inatsisartut Allattoqarfiat
/Maani

**§ 37 naapertorlugu Namminersorlutik Oqartussat suliffeqarfiutaanni atorfilittut
pisortatullu atorfinitsitsisarneq pillugu apeqqummut nr. 2017/086-imut
akissuteqaat**

01-03-2017
Suliap nr. 2017 - 4719
Allakkat nr. 4658136

Asasara Anthon Frederiksen,

Postboks 1015
3900 Nuuk
Oqarasuaat (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

Namminersorlutik Oqartussat suliffeqarfiutaanni atorfilittut pisortatullu atorfinitsitsisarneq pillugu Inatsisartut suleriaasianni § 37 naapertorlugu Naalakkersuisunut apeqquteqaateqarputit. Apeqqutigisatit uannit akissassanngortinneqarsimapput.

Suliffeqarfiit Namminersorlutik Oqartussanit pigineqartut pillugit apeqqummut akissuteqaatinni aktiaateqarluni ingerlatseqatigiiffiit Namminersorlutik Oqartussanit pigineqartut eqqartussavakka. Suliffeqarfiit Namminersorlutik Oqartussanit pigineqartut pillugit apeqqutinut tamanut ataatsimoorussamik oqaatigisinnaavara, Naalakkersuisut aktiaateqarluni ingerlatseqatigiiffinni sulisoqarnermut allaffissornermut akuleruttanngitsut.

Naalakkersuisut aktiaateqartutut ingerlatseqatigiiffiillu ingerlatsinerisa akornanni akissusaaffinnik piginnaatitaaffinnillu agguaneq pillugu aktiaateqarluni ingerlatseqatigiiffiit pillugit inatsimmi tunngaviit nalinginnaasut naapertorlugit aktiaateqarluni ingerlatseqatigiiffinni sulisoqarnermut allaffissornermi aalajangiinernut Naalakkersuisut akuliuttusaanngillat. § 37 naapertorlugu Namminersorlutik Oqartussat suliffeqarfiutai pillugit taakkulu sulisoqarnermut allaffissornerat pillugu apeqqummut nr. 2017/068-imut akissuteqaammi tamanna ilaatigut itinerusumik nassuiarneqarsimavoq.

Akerlianilli Nukissiorfiit Nalaakkersuisunit pigineqartoq suliffeqarfittut namminersortitatut ingerlavoq, Aningaasanut Inatsisip siunertaani 64.12, Nukissiorfiit takuuk. Inuussutissarsiornermut, Suliffeqarnermut, Niuernermit Nukissiuuteqarnermullu Nalaakkersuisoqarfik Nukissiorfiit pillugit apeqqutinut iluaqutaasussanik Nukissiorfimmu pissarsisimavoq. Suliffeqarfiup tassunga atatillugu erseqqissaatigaa, Nukissiorfiit sulisui qassit kalaallisut oqaluttuunersut allattugaatiginagit. Taamaammatt akissutinni kisitsisit eqqunngeratarsinnaapput. Ukiuni ataasiakkaani atorfinitsitsinernut allattorsimaffik sulisut ataasiakkaat nunaqavissuunersut avataaneersuunersulluunniit eqqoriaanermik tunngaveqarpoq.

Aktiaateqarluni ingerlatseqatigiiffiit Namminersorlutik Oqartussanit pigineqartut assinganik paasissutissiipput ingerlatseqatigiiffiit sulisuisa oqaatsitigut piginnaasaat taamatuttaaq sulisut ataasiakkaat suminngaanneersut nalunaarsugaatiginngikkaat.

Apeqqudigineqartunut tunngatillugu imaattunik akissuteqassaanga:

1. Namminersorlutik Oqartussat suliffeqarfiutaanni kalaallisut oqaasilinnik ilinniarsimasunik atorfilinnik aamma kalaallisut oqaasilinnik pisortalersugaanikkut ineriartorneq ippa?

Akissut:

Aktiaateqarluni ingerlatseqatigiiffiit Namminersorlutik Oqartussanit pigineqartut paasissutissiipput ingerlatseqatigiiffiit sulisuisa oqaatsitigut piginnaasaat taamatuttaaq sulisut ataasiakkaat sumingaanneernersut nalunaarsugaatiginngikkaat. Taamaammat Naalakkersuisut apeqqudigineqartumut kisitsisinik pigineqartunik naatsorsuinikkut allattorsimaffinnit aallaaveqartumik akissuteqarsinnaangillat.

Matumani oqaaseqaatit ilallugit paasissutisseeqqiissutitut Muté B. Egedep, Inuit Ataqatigiit, Namminersorlutik Oqartussani suliffeqarfiutaanilu nunaqavissunik atorfinitsitsisarneq ilaatigut pillugu § 37 naapertorlugu apeqqutaanut nr. 2016/062-imut Aningaasaqarnermut Aatsitassaqaqarnermullu Naalakkersuisuusimasup Randi Vestergaard Evaldsenip akissutaa innersuutigisinnaavara. Nunaqavissunik ilinniarsimasunik atorfinitsitsisarneq pillugu suliffeqarfinnit arlalinnit oqaaseqaatit akissummi ilanngunneqarsimapput.

2. Namminersorlutik Oqartussat suliffeqarfiutaanni tikisitanik sulisoqarnikkut aamma pisortalersugaanikkut ineriartorneq qanoq ippa?

Akissut:

Apeqqummut 1-imut akissutit ilallugit paasissutissiissutigisinnaavara Naalakkersuisut apeqqudigineqartumut kisitsisinik pigineqartunik naatsorsuinikkut allattorsimaffimmik akissuteqarsinnaangitsut.

Matumani oqaaseqaatit ilallugit paasissutisseeqqiissutitut Siverth K. Heilmann, Atassut, Namminersorlutik Oqartussat suliffeqarfiutaanni avataanit atorfinitsitsisarnerup ineriartornera ilaatigut pillugu § 37 naapertorlugu apeqqutaanut nr. 2016/120-imut Aningaasaqarnermut Aatsitassaqaqarnermullu Naalakkersuisuusimasup Randi Vestergaard Evaldsenip akissutaa innersuutigisinnaavara.

Taassuma saniatigut sumi inunngorsimaneq aallaavigalugu akissarsiaqarneq 1991-imi atorunnaarsinneqartoq tikisitanit ersarissarneqarsimasooq pillugu § 37 naapertorlugu illit apeqquternut nr. 2016/176-imut Aningaasaqarnermut Aatsitassaqaqarnermullu Naalakkersuisuusimasup Randi Vestergaard Evaldsenip akissutaa innersuutigisinnaavara. Taamaalillutik "nunaqavissut" "tikisitalu" taaguutaat atorunnaarsinneqarput, aamma taamanikkulli Namminersorlutik Oqartussani kommuninilu pisortatigut isumaqatigiissutini akissarsiatigut atorfinitsinneqarnermilu

atugassarititagitut sumi inunngorsimaneq suminngaanniillu tikisinneqarsimaneq apeqquataajunnaarsimavoq.

3. Nukissiorfinni kalaallinik ilinniarsimasunik sulisoqarnikkut kalaallinillu pisortaqaarnikkut ineriartorneq ukiuni kingullerni tallimani qanoq isikkoqarpa ?

Akissut:

Ilisimatitsissutigineqassaaq, Nukissiorfimmi ukiuni kingullerni tallimani aalajangersimasumik atorfillit 279-it akornanni sulisut 202-it kalaallisut oqaaseqartuummata. Ukiuni kingullerni tallimani kisitsisit takutippaat najukkameersunik atorfinitsitsinerit 2012-imi 66%-imiit 2016-imi 75%-inut amerliartorsimasut.

4. Namminersorlutik Oqartussat suliffeqarfiutaanni atorfillit pisortallu kalaallisut oqalussinnaasut atorfinninniitiinnarnissaat qulakkeerniarlugu Naalackersuisut qanoq iliuuseqarpap ?

Akissut:

"Namminersorlutik Oqartussani aktiaateqarluni ingerlatseqatigiiffinni tamakkiisumik ilaannakortumilluunniit pigineqartuni piginnittuunermut tunngasut taakkunanilu ineriartorneq pillugit nassuiaat"-imi Inatsisartut 2011-imi ukiakkut ataatsimiinneranni isumaqataaalluarfigineqartumi kapitali 3-imi ilaatigut allassimavoq ingerlatseqatigiiffiit ineriartorneq peqataassasut aammalu piginnaasanik pingaarnernik Kalaallit Nunaanni pigiliunneqartussanngortitsinissaq Naalackersuisut pingaartikkaat. Inassuteqaatigineqarsimasoq tamanna sulii atuuppoq.

Tamatuma saniatigut Siumut, Inuit Ataqatigiit aamma Parti Naleraq ukiuni 2016 - 2018 atuuttussamik naalackersueqatigiinnissamik isumaqatigiissutaanni oqaasertat innersuussutigissavakka. Tassani ilaatigut atuarneqarsinnaavoq kilisaatini avataasiutini kalaallit naalakkatut aquttutullu naammassereersimasut salliutillugit atorneqarnissaat Naalackersuisut sulissutigissagaat. Tassunga tunngatillugu suliffeqarfinnut pisortanit pigineqartunut ingerlatseqatigiiffinnullu namminersortunit pigineqartunut atugassarititat piumasaaqatillu assigiipput.

Apeqqutigisannut akissutigisanni aallarniutitut oqaatigisakka innersuussutigalugit erseqqissaatigeqqissavara aktiaateqarluni ingerlatseqatigiiffinni Namminersorlutik Oqartussanit pigineqartuni sulisunut tunngatillugu aalajangersakkat Naalackersuisunit akuleruffigineqarsinnaanngitsut Naalackersuisut taamaaliornissaq piginnaatitaaffiginngimmassuk. Atorfinitsitsinerit ataasiakkaat "ingalassimaartitsinissamik periaaseq" tunngavigaluguingerlatseqatigiiffiit namminnerlutik akisussaaffigimmassuk aammalu ingerlatseqatigiiffiit ingerlanneqarnerinut tunngasut Naalackersuisunit akuleruffigineqarneq ajormata

ingerlatseqatigiiffiit Namminersorlutik Oqartussanit tamakkiisumik
ilaannakortumilluunniit pigineqaraluarpataluunniit.

Suliffeqarfinni Namminersorlutik Oqartussanit pigineqartuni kalaallit oqaasiinik nukittorsaaneq pillugu § 37 naapertorlugu Suka K. Frederiksenimut apeqqut nr. 2015/158 peqatigisaanik akissutigisannut innersuussutigineqarsinnaavoq.

5. Ukiuni kingullerni tallimani Nukissiorfinni kalaallit atorfillit pisortallu qassit atorfinitsinneqarpat ? aamma qassit soraarsinneqarpat ? imaluunniit namminneq soraarpat ?

Akissut:

Ilisimatitsissutigineqarpoq Nukissiorfimmi ukiuni tallimani kingullerni 202-nik nunaqavissunik atorfeqartoqarsimasoq, taakkunanilu piffissami tassani decembari 31-at 2016-ip tungaanut 89-it, sulisut 44%-ii, tunuarsimallutik.

Soraarsitaasimasut nammineerluniluunniit tunuarsimasut matumani pineqarnersut akissarsialeriffimmi nalunaarsorsimangillat.

6. Ukiuni kingullerni tallimani Nukissiorfinni tikisitat atorfillit pisortallu qassit atorfinitsinneqarpat ? aamma taakkunannga qassit soraarsinneqarpat imaluunniit namminneq soraarpat ?

Akissut:

Ilisimatitsissutigineqarpoq ukiuni kingullerni tallimani piffissami decembari 31-at 2016-ip tungaanut sulisuni 77-ini 42-t, sulisut 55%-ii, tunuarsimasut.

Soraarsitaasimasut nammineerluniluunniit tunuarsimasut matumani pineqarnersut akissarsialeriffimmi nalunaarsorsimangillat.

Apeqqummut saqqummiunneqartumut allanik oqaaseqaatissaqanngilanga.

Med venlig hilsen
Inussiarnersumik inuulluaqqusillunga



Kim Kielsen



Inatsisartut suleriaasiat § 37 malillugu, immikkoortoq 1 naapertorlugu matumuuna Naalackersuisunut apeqqut imaattoq saqqummiuppara:

Naalackersuisunut apeqqut:

- 1. Namminersorlutik Oqartussat suliffeqarfiutaanni kalaallisut oqaasilinnik ilinniarsimasunik atorfilinnik aamma kalaallisut oqaasilinnik pisortalersugaanikkut ineriartorneq ippa?**
- 2. Namminersorlutik Oqartussat suliffeqarfiutaanni tikisitanik sulisoqarnikkut aamma pisortalersugaanikkut ineriartorneq qanoq ippa?**
- 3. Nukissiorfinni kalaallinik ilinniarsimasunik sulisoqarnikkut kalaallinillu pisortaqarnikkut ineriartorneq ukiuni kingullerni tallimani qanoq isikkoqarpa ?**
- 4. Namminersorlutik Oqartussat suliffeqarfiutaanni atorfillit pisortallu kalaallisut oqalussinnaasut atorfiminniitiinnarnissaat qulakkeerniarlugu Naalackersuisut qanoq iliuseqarpat ?**
- 5. Ukiuni kingullerni tallimani Nukissiorfinni kalaallit atorfillit pisortallu qassit atorfinitsinneqarpat ? aamma qassit soraarsinneqarpat ? imaluunniit namminneq soraarpat ?**
- 6. Ukiuni kingullerni tallimani Nukissiorfinni tikisitat atorfillit pisortallu qassit atorfinitsinneqarpat ? aamma taakkunannga qassit soraarsinneqarpat imaluunniit namminneq soraarpat ?**

(Inatsisartunut ilaasortaq, Anthon Frederiksen, Partii Naleraq)

Tunngavilersuut:

Nunatta namminiilivinnissaa qujanartumik maanna pimoorullugu sulissutigineqalerpoq. Taamaattumik pisariaqartorujussuuvoq kalaallinik ilinniarluarsimasunik sapinngisamik amerlanerpaanik sulisoqarnissaq, taakkuninngalu siuarsaanissaq aamma sulisunik nunaqavissunik ilinniarluarsimasunik attassiinnarnissap pikkorissaanikkut ilinniartitseqqittarnertigullu siuarsaajuarnissaq.

Taamaammat assut soqutiginarpoq qulaani apeqqutit sukumiisumik
akissuteqarfigineqarnissaat.

Ullut suliffiit qulit qaangiutinnginnerani akineqarnissara kissaatingaara.